

光緒重修安徽通志

重修安徽通志卷一百九十七

人物志

官績二十

鳳陽府

明李善長字百室定遠人少讀書有智計太祖略地滁陽善長迎謁留掌書記從下滁州爲參謀預機畫主饋餉甚見親信太祖軍和陽自將擊雞籠山寨少留兵佐善長居守元將謀知來襲設伏敗之太祖以爲能既得巢湖水師力贊渡江江南行省建以爲參議軍機進退賞罰章程多決於善長太祖爲吳王拜右相國命居守將吏帖服居民安堵轉調兵餉無乏嘗請椎兩淮鹽立茶法制錢法開鐵冶定魚稅國用益饒而民不困吳元年封宣國公改官制尙左以爲左相國與中丞劉基等裁定律

令太祖卽帝位帥禮官定郊社宗廟禮奏定六部官制議官民喪服定嶽瀆神祇封號封建諸王一切禮儀事無巨細皆謀議行之洪武三年大封功臣授太師中書左丞相封韓國公位第一制詞比之蕭何四年以疾致仕胡惟庸謀反善長弟存義之子惟庸從女婿也坐與交通詞連善長會有言星變其占當移大臣遂坐誅

明史本傳

徐達字天德濠人少有大志太祖爲郭子興部帥達往從之一見語合從取和州授鎮撫子興執孫德崖德崖軍亦執太祖達挺身往請代太祖得歸從渡江破采石取太平下集慶與常遇春皆爲軍鋒冠及在池州與遇春敗陳友諒軍於九華山下生擒三千人遇春欲盡殺之達不可而遇春以夜阬其人過半太祖不懌於是始命達盡護諸將太祖稱吳王以達爲左相國拜

大將軍以遇春爲副將征吳平江將破令將士曰掠民財者死
毀民居者死離營二十里者死旣入吳人安堵如故還封信國
公尋拜征虜大將軍與副帥遇春北取中原洪武元年太祖卽
帝位以達爲右丞相師克通州元主北遯遂入都不戮一人封
府庫籍圖書寶物以兵守宮殿門使宦者護視諸宮人妃主禁
士卒毋得侵暴吏民安居市不易肆遂移兵平山西常遇春卒
復以李文忠爲副將軍從達分道出兵達出西道破庫庫文忠
出東道克應昌獲元嫡孫妃主將相露布聞詔班師大封功臣
授達太傅中書右丞相改封魏國公達每出師還輒上將印賜
休沐宴見歡飲有布衣兄弟稱而達愈恭慎帝嘗從容言徐兄
功大未有安居可賜以舊邸舊邸者太祖爲吳王時所居也達
固辭一日帝與達之邸強飲之醉而蒙之被昇臥正寢達醒驚

趨下階俯伏稱死罪帝覘之大悅乃命有司卽舊邸前治甲第表其坊曰大功胡維庸欲結好於達達不答賂聞者使圖達聞發之達亦不問惟時時爲帝言胡惟庸不任相後果敗帝益重達十八年卒追封中山王謚武甯配享太廟肖像功臣廟位皆

第一

明史本傳

郭景祥濠人從渡江典文書佐謀議性諒直博涉書史遇事敢言太祖親信之嘗曰景祥文吏而有折衝禦侮才可大任也滁州太平溧陽城郭不完輒命景祥董治之和州守臣言州城久廢命景祥相度卽故趾城之九旬而工畢授和州總制益治城隍樓櫓廣屯田練士卒威望肅然和遂爲重鎮仕終浙江行省參政

明史本傳

王濂字習古定遠人李善長婦兄也太祖克集慶渡江來歸除

執法官讞獄平允出爲浙江按察僉事治行著聞大風晝晦濂
應詔言民瘼請緩征太祖納之洪武三年卒上謂善長曰濂有
王佐才今死朕失一臂矣

明史郭景祥傳

毛騏字國祥定遠人太祖自濠趨定遠騏出降太祖喜畱與飲
食籌兵事悉當意從渡江擢行省郎中文書機密皆與李善長
協贊尋授參議委以心膂俄病卒太祖親爲文祭之子驤以功
官都督僉事嘗掌錦衣衛事典詔獄

明史郭景祥傳

單安仁字德夫濠人元末授樞密判官從鎮南王博囉布哈守
揚州鎮南王爲槍軍所逐安仁無所屬率眾來歸太祖悅卽命
將其軍守鎮江移守常州遷浙江按察副使時悍帥橫斂名曰
寨糧安仁置於法洪武元年擢工部尙書仍領將作事諸所營
造大小中程甚稱帝意改兵部尙書請老歸家居奏請濬儀南

壩以便輸輓疏轉運河江都深港以防淤淺移瓜州倉廩置揚

子橋西免大江風潮之患帝善其言卒年八十五

明史本傳

楊楨字邦祥定遠人以儒士爲庫官時天下初定刑獄未平楨上疏極言眾皆危之翌日上御便殿召授福建都轉鹽運使下車率令計口食鹽官不勞而民易辦私鬻用稀三年得代入京民泣送之

定遠縣志

張德林濠人以元帥守揚州時兵火之餘城中居民僅十餘家

德林招集流亡戶口日繁威肅惠懷軍民輯睦

江南通志

湯友恭懷遠人洪武十七年任都察院右都御史二十一年免

明史七卿表

懷遠縣志

按縣志云友恭以人才應薦意其材必有過人者今湯氏俱非其後致生平行事無考甚可惜也

王恭濠人尙太祖女福成公主洪武二年爲福建行省參政諭之曰民病未蘇汝往綏之母恃親故朕不汝縱恭至撫循凋弊

命指揮李惠爲福州築城先造一城於城北跨越王山今名樣

樓

明史公主傳
福建通志

唐元字元亨臨淮人知無爲州招徠流散安集有方以課最擢

太僕寺卿

無爲
州志

楊冀安靈璧人洪武初歷官工部侍郎奉使雲南有異績卒官

賜祭葬

江南
通志

莊敬靈璧人洪武中歷官山西布政司參政轉河南臨事明決

子弟不衣羅綺宅以茅蓋升布政司致仕

靈璧
縣志

尹邇安豐人洪武初任興縣政平訟簡賦役均平升知遼州民

思其惠立善政碑後遷平陽府同知

一統志山
西名宦

胡維賢定遠人洪武五年以平陽府同知升太原知府清謹端

正剔蠹搜弊解紛決壅談笑處之又創修府治

山西通志
新增

梁瑀字與玉濠人洪武中知永嘉縣承元弊政民田多匿賦軍需且殷饋餉不給時自浙西海運以足之既而命覈田瑀乃履畝占數編號畫圖以正經界由是歲額有加軍供亦裕而海運乃罷

浙江通志

耿忠濠人洪武初以羽林衛指揮使奉命往兩浙聽訟訪察官吏問民疾苦時紹興三衢金華秋旱農事不登有司阻民告災忠以疏聞民皆德之

浙江通志

魏必興濠人洪武初知耀州凡州治學舍與里甲徭賦驛傳諸務皆必興所創定

一統志陝西名宦

吳立宿州人洪武初以大都督府斷事招撫遼東遷蓋州衛指揮僉事再破納哈出有軍功守蓋二十餘年治城郭練兵甲課農興學勤勞夙夜兵食饒足政事修舉人多頌之

一統志直隸名宦

劉璧鳳陽人洪武初任曲靖衛指揮築城建署廣開屯田措置

皆有條理

雲南通志
新增

吳原庸濠人洪武初知壽陽縣招集流散教之耕作設縣署廢

淫祠立學宮事多修舉

一統志山
西名宦

徐良弼字子中懷遠人洪武初知貴溪縣承平未久百姓離散

良弼撫綏休息民漸復業時賦多雜科乃具申民瘼不從輒至

府涕泣言之遂得告免民賴以安

江西通志
新增

張鵬舉濠人洪武初知浦城縣畱心學校建大成殿立城隍廟

及山川社稷壇稱循吏最

福建
通志

黃彥正濠人洪武初知醴陵縣時方開創修舉廢墜綜理合宜

招撫流移最於列邑

湖南
通志

韋衡濠人洪武初知安仁縣建縣治修學校置驛站規模煥然

湖南通志

莫已知鳳陽人洪武初知吉安府時天下甫定郡縣規制率苟簡未備已知加意振刷興仆立踣煥然改觀持己廉重待民慈惠民甚安之

江西通志新増

曹鳳臨淮人洪武時為廣甯中屯衛指揮同知築城溶池創造

衛治撫恤士卒官至都指揮同知

一統志直隸名宦

朱璣濠人洪武初知鄱縣設科條謹區畫期年百廢具舉

湖南通志

詹彥忠臨淮人洪武中以參軍鎮守辰州創立衛所增浚城池

軍政嚴肅民賴以安

一統志湖南名宦

朱浚靈璧人洪武中知善化縣勸農修學善治獄訟鄰邑有冤

者咸訴於庭擢工部員外郎出為江西僉事執法不撓為時所

稱

湖南通志靈璧縣志

狄崇濠人洪武中爲濟甯左衛指揮使築城濬池創設公署善

政居多

山東通志

陳德鳳陽人洪武中官沁水丞修治城垣公廨廟學壇壝鋪舍

其功甚多

山西通志

吳建忠定遠人洪武中知望江縣開創之初亭署祠廟多所創

建卒於官畱葬望江子孫家焉

安慶府志

馬世熊臨淮人累官至營田使卒於官太祖親爲文祭之

明史后妃

傳江南通志

郁新字敦本臨淮人洪武中以人才徵授戶部度支主事遷郎中擢本部右侍郎嘗問天下戶口田賦地理險易應答無遺帝稱其才進尙書定親王郡王以下歲祿又以邊餉不足定召商開中法令商輸粟塞下按引支鹽邊儲以充建文時引疾歸成

祖卽位召掌戶部事河南蝗有司不以聞新効治之理邦賦十

三年長於綜理密而不繁卒賜祭葬明史本傳

尹綬字廷章定遠舉人任御史舉刺無所顧忌永樂初使海外

歸歷數萬里山川島嶼悉繪圖以獻江南通志

羅昭字景南壽州人洪武中以舉人官右春坊皇孫出閣簡爲

侍讀以賢傳稱壽州志

張貫靈璧人洪武中歷官至北平參議永樂改北平爲順天府

貫首爲府尹爲政嚴明不阿權勢卒於官江南通志

徐士誠定遠人洪武元年知江南興化縣集流亡闢田畝建官

署創始之功規制畢善興化縣志 揚州府志 新增

賈彥良定遠人洪武二年知揚州儀徵縣招撫流民復業建學

棧創署廨庶務修舉廉明有聲儀徵縣志 揚州府志 新增

楊吉字天祐先世宏農元末徙壽春縣明初爲壽州人登洪武

乙丑進士任大理寺評事不陵不詭歷山東左布政使效忠盡

職沒祀鄉賢

壽州志
新增

蔣忠懷遠人父原永平衛百戶忠襲職升永清千戶以從靖難
功升江西都司都指揮同知先是守將多貪墨縱士卒爲盜民
久苦之忠至申明軍律取其無賴者繩之以法由是民賴以安
永樂十一年卒於官

江西通志
新增

趙畿字邦翰宿州人官金華推官發奸如神

江南
通志

陳璇字在璣定遠人永樂辛丑進士授御史巡按浙江廣西所

至肅然歷浙江按察使寬不縱猛不殘浙人懷德或謂少擊搏

風璇曰法貴禁人不犯至不從禁而犯法余亦何嘗少貸耶後

赴闕軍民數千人挽留馬不能前璇爲駐一宿取聞道去

浙江
通志

李默字思道定遠人永樂中以貢上書言事朝廷奇其才擢漢王府長史王有異志默苦諫王怒禁錮之事敗默尙繫獄特釋

還鄉里

明史高煦傳
江西通志

李達定遠人永樂初以都指揮僉事鎮洮州歷四十年爲番漢所畏進都督僉事正統中致仕

一統志甘肅名宦

陳原定遠人永樂中爲都勻衛指揮有材略善謀能斷正統時苗寇圍城原罄產給軍城賴以全

一統志貴州名宦

許亨字士通定遠人以父蔭爲指揮使僉事進都指揮鎮浙江

海寇竊發守屯堡時訓練寇遂屏跡歲調兵運漕給京師分番

更代勞逸均而餽餉及期拜左軍都督僉事卒於官

浙江通志

胡敏字銳之定遠人宣德六年知鄞縣操守端方臨事剛果升

監察御史

浙江通志

徐源字士淵定遠人官吏部司務著能聲擢知縣歲饑且屬役築錢塘隄源以民不能自存之狀力爭得免發廩以賑又勸貸富人以助之躬巡實給以勞成疾卒官

定遠縣志

年富字大有懷遠人本姓嚴訛爲年以會試副榜授德平訓導擢吏科給事中糾正違失務持大體兼掌刑科都御史顧佐等失入死罪十七人富劾之又奏遣僧道未度者復業遷陝西左參政疏罷歲織綾絹耗毼毼九百五十餘匹又會計歲用以籌軍餉請減冗卒汰騫馬三邊士馬供億浩繁豪猾因緣爲奸富量遠近定徵科出入慎鉤考宿弊以革民困大蘇遷河南布政使歲饑流民二十餘萬剽掠富輯之皆定土木敗後邊境道阻部檄富轉餉無後期者景泰二年以右副都御史巡撫大同提督軍務以奏石亨等侵餉劾張懋鄭宏等役軍耕田爲宵小

所憾天順元年革巡撫官富遂罷爲石彪所誣逮下詔獄賴李

賢言之而免復爲兵部右侍郎改戶部巡撫山東召爲戶部尙

書部事大理病疽卒諡恭定

明史本傳

楊慶長壽州人正統閒知通城縣九載奏績民德而畱之請於

朝復任九年秩滿又請凡二十三年

湖北通志新增

王智字景明壽州人正統中以舉人知靈邱縣均賦平政教化

大行及去父老遮道請畱後任平涼通判乞休歸

壽州志

戴昂字時舉宿州人正統戊辰進士授御史以言事謫相口驛

丞遷知淮縣在任九載守法奉公民不忍欺

江南通志

徐士遠定遠人正統中以舉人知嶧縣時值旱蝗請得米八百

石以賑已而洊饑憂惶成疾卒

浙江通志

樂濬定遠人正統中官九谿衛指揮使威惠兼至修城創署整

飭關梁令行邊徼

湖南通志

黃璵字仲玉定遠人性孝友母疾嘗糞得遺金市米中還之景

泰中以舉人官昌邑訓導分科設教先行後文士風丕變遷上

猶教諭嶺海閒士習尤陋璵親訓之人才勃然

定遠縣志

張僖字公錫靈璧人景泰甲戌進士授御史以事謫知永甯縣

有惠政以艱歸起補餘姚邑有水怪虎患僖爲文祭之遂息升

杭州知府歲饑設法賑濟全活六萬戶晉湖廣參政未行卒杭

人祠祀之

浙江通志江南舊通志

宋誠定遠人晟曾孫天順中佩征西將軍印鎮甘肅邊備修飭

西陲晏然

一統志甘肅名宦

楊完字德全定遠人天順丁丑進士官翰林檢討以德性醇粹

文章典雅選侍德王講讀誠心輔導時論賢之

定遠縣志

湯爾字用之壽州人成化乙未進士授行人擢御史孝宗卽位
爾首劾萬安罔上誤國又言少傅劉吉奸貪尙書王恕以盛暑
請輟講筵極言不可語侵恕時言路大開士欲以功名見頗傷
激訐而爾意氣尤銳吉不能堪嫉御史劾之欲置之死賴何喬

新王恕彭韶持之得謫肅州謝遷柄政始釋歸

明史本傳

蔡震字孟陽定遠人尙英宗女涇安長公主授駙馬都尉嗜學
博文敬賢禮士奉使外藩及居官尤以廉介稱於時卒贈太保

謚康僖

定遠縣志

王昶靈璧人成化丙戌進士知樂安縣令燬淫祠適有火災民
不敢毀昶自碎其妖像火患亦息歲凶以便宜發粟賑濟全活
甚多擢御史疏劾李孜省改太僕寺少卿

江南通志

劉福字宗慶臨淮舉人任兗州府管泉同知河決張秋奉檄築

河口石隄卒於官祠祀安平鎮

江南通志

朱詮鳳陽人成化中知渠縣廉能公恕賦稅訟獄允服民心後有除寇功詔賜旌異

四川通志
新增

顧佐字良弼臨淮人成化己丑進士授刑部主事歷郎中按錦衣指揮牛循中官顧熊牛欽罪無所撓出爲河閒知府宏治中擢右僉都御史巡撫山西入爲左副都御史勘罷總兵李杲太監任良巡撫張王歷戶部侍郎出理陝西軍食善區畫儲蓄餘三年正德改元代韓文爲尙書部有逸冊劉瑾欲以爲文罪偪佐上其事不可坐事奪俸乃乞歸瑾憾不置罰米千餘石輸海上卒贈太子太保

明史韓文傳

王嶽字希甫靈璧人成化辛丑進士知平陽縣以明人倫正風俗爲首務建議倉廣儲蓄六年之間奸豪屏息以治行徵

浙江通志

莊俊鳳陽人以貢授南陽推官躬校簿書手書理刑箴於座右以自警凡所推鞠號無冤民以疾歸足跡不入公府

鳳陽縣志

張袞鳳陽人成化丁未進士知蒲江縣政績藉甚時劉賊猖獗以才望調固安守禦備至孤城得全俗以婚嫁論財多失時不能成禮袞權豐約著爲令會入覲劉瑾陰令賄二千金可得科道袞不從還瑾怒矯旨逮捕士民欲斂金求免袞恥用賄且不欲擾民遂飲藥死民爲立祠

鳳陽縣志

周鉞字仲威宿州人宏治己未進士知永興縣報最劉瑾招之見曰吾力能授爾御史鉞不往遂改進賢教諭尋授公安知縣

稱疾不起

江南通志

余翱字大振定遠人正德辛未進士知歷城縣嘉靖初爲御史劾司禮太監張佐蒙蔽罪尋以議大禮繫詔獄廷杖戍邊隆慶

初贈光祿寺少卿一統志

姚鳳懷遠人正德甲戌進士歷戶部郎中奉差督甘肅永平山海薊州等處糧餉建議請發豹房餘銀助邊抽分九江祛弊防奸至招買通州濟邊草束催太倉江西糧運歷有勞績以疾歸

懷遠縣志

劉信鳳陽人成化中知乳源政簡刑清性最孝母卒一慟而絕

無子士民葬之城東一統志廣東名宦

高越鳳陽舉人署福山教諭值劉賊猖獗知縣棄城走越首倡

忠義嬰城死守賊遞去超拜監察御史清軍湖廣革親藩之僭

巡按遼左明功罪嚴賞罰積弛一振出知泉州府致仕歸一統志

劉曷字晉初鳳陽人嘉靖己丑進士知山陰縣案無畱牘瀕海

漲沙千頃民因爲田歲有獲而無徵曷履畝而以無抵糧稅量

均於內民甚便之遷刑部主事歷知山東分巡濟甯道泰安州牧賊爲民所發或欲爲之地曷不可竟落職以疾卒官

浙江通志

陽縣志

宋治字時雍臨淮人嘉靖辛丑進士授開封推官擢御史出爲台州知府平倭有功調嘉興復有功升貴州副史歷南太僕寺丞山東僉事貴州參議清操勁節所至有聲

鳳陽縣志

李心學字師顏臨淮人嘉靖丁未進士授戶部主事歷員外郎出知衛輝府擢湖廣兵備副使剿平潋浦龍潭洞猺賊沈亞當等並撫順糯塘二十八寨惡苗龍老糯等及蕩平容山景峒又叛寇韓甸等轉雲南參政歷升湖廣右布政調貴州左布政復剿平新添衛小平代長官司貪達寨叛蠻莫繼恩等璽書褒美弟志學以舉人任直隸新安知縣調新城銳意興革力抗中貴

民保久任加祁州知州

江南通志
鳳陽縣志

張育才壽州衛人嘉靖二十年以選貢爲黃巖丞廉介自持公

餘卽荷鋤藝蔬以自給升句容令

浙江通志
新增

李純樸定遠人嘉靖閒以御史謫知監利縣輟輶城建大觀書

院

一統志
湖北名宦

梁子琦字汝珍壽州人嘉靖乙丑進士知諸暨縣愛士恤民興

廢舉墜終通政司參議

江南通志

陳世輔字汝鄰定遠人嘉靖進士除南昌知縣溫厚慈祥視民

如子嘗有兄弟爭財者世輔且諭且泣兄弟二人竟以田相讓

庭無滯案治爲先後南昌之最

江西通志
新增

劉繼文靈璧人嘉靖壬戌進士知萬安縣以廉惠著擢禮部主

事

海瑞並稱書天下清官第二歷任福建江西四川布政巡撫廣

西總制兩廣晉戶部侍郎卒於家

一統志

楊時秀字叔茂懷遠人嘉靖乙未進士知海甯縣調歸安杜詭

寄以均賦興學校以育才擢戶部主事榷稅淮安禁剔宿弊歷

郎中升山東僉事分巡東兗平女妖紅羅之亂以艱歸遂不起

懷遠縣志 孫秉陽所作墓表

沈舉字用之定遠人爲莆田丞仁廉剛正以禦漳寇盡瘁殉國

卒於砦貧不能斂當道賻以歸殯莆人爲請祀名宦

定遠縣志

楊嘉猷字原中懷遠舉人官冀州守剔奸宄肅馬政稅璫橫甚

廉得其黨之最黠者笞逐之捐公費羨帑以抵稅杖殺盜魁萬

某餘黨迸散旱蝗害歲首請蠲賑全活無算遷延安清軍同知

署定邊篆築長堰禦水患復攝靖邊篆條上邊事六創建龍州

城升長蘆鹽運副使遷鎮遠府致仕

何如寵所作墓志 馮從吾少墟集 懷遠縣志

葉欽字用明定遠人通判處州諭散礦徒永絕處患調郎陽白

平民江潯等冤屬邑多寇捕逮五百餘人鞠可原者全活大半

升鄆府審理以老歸

定遠縣志

楊應聘字行可時秀孫也萬厯癸未進士知烏程縣緩催征平

冤滯興隄防清浮田勤荒政倡教化不阿上官不假貴要治稱

最擢兵部主事歷郎中升光祿少卿巡撫甯夏總制三邊歷至

兵部左侍郎卒於官贈兵部尚書賜祭葬

浙江通志 江南通志

張宏代靈壁選貢知天台縣識度凝重操守清廉興利革弊嘗

修邑志以循良擢戶部主事同邑李邑亦以選貢知天台歲饑

多方賑濟以亢直改教職歸

浙江通志 靈壁縣志

賴霖定遠人萬厯中知安仁縣銳意興革清丈田畝去浮糧八

百石

湖南通志

李繼東定遠人萬厯中爲武岡學正時進諸生講明正心誠意

之學著學一圖說鐫石明倫堂

湖南通志

田大年定遠人萬厯中知華容縣修學校浚城隍舉行義倉社

倉法遇水旱力請蠲賑

湖南通志

夏之鳳字子鳴壽州人萬厯中以舉人知大庾縣改羅江泣民

廉慎士庶懷之擢戶部郎有內豎白玉犯法潛避深宮鳳入奏

敕玉出聽審上嘉其正直書名於屏

江南通志

江旰字天奇懷遠歲貢任延津訓導升高密教諭賑貧卻贅出

於至誠兩學皆祠祀之後爲廣信教授因事關學校據理力爭

之爲權貴所忌歸

懷遠縣志

吳諗字樂真定遠人知通城政尙慈厚時聞寺借采礦名毀廬

墓以詐巨家諗輒治之以法坐是奪官

定遠縣志

周汝昌字文明懷遠舉人任台翊懷慶歸德三府推官擢戶部主事黜羣邪豁逋賦均水利以不肯建生祠忤魏璫戍肅州卒

江南通志

劉繼吳字徵夢壽州人萬厯己未進士歷禮部郎中考滿爲天

下清廉第一歸里日惟圖書數卷

壽州志

劉繼魯字政東壽州人以貢爲潛山教諭胸懷高寄翛然塵表

俸錢自杯酒論文外惟以給士之貧者大有古人風

安慶府志

盛民直字澹惺定遠歲貢知藍山縣斥冗蠹平市價通商賈明

季苦重斂躬詣勸徵吏不擾而民力紓訟獄衰息遇旱步禱得

霖三日不少越藍山界邑人立碑記異

定遠縣志

戈尙友字善卿臨淮舉人知饒平縣地產斷腸草訟者藉以作

姦尙友嚴禁之有犯科者令拔此草投沿海井中以贖罪後海寇至取水飲多死遂遞去擢刑部主事持法平允歷官昌平兵

備副使

江南通志

袁稽字大賓懷遠人以貢倅東昌治河有功遷泰安知州誅鋤强暴胥吏畏服有以黃金進者峻卻之修岱嶽十八盤至今便

焉

懷遠縣志

周希賜字一勿懷遠舉人知甯昌縣催科不及格調福建布政司理問後補甯洋知縣涖任三月頌聲大作卒於官祀名宦

懷遠縣志

孫元謨懷遠人以參將從貴州巡撫王三善救貴陽分兵三路元謨從三善由中路當賊鋒遂奪龍里又奪七里冲進兵畢節鋪連戰皆捷其渠安邦俊中礮死獲安邦彥弟阿倫遂抵貴陽

城賊解圍去

明史王三善傳

何陞字望宸定遠人崇禎閒選貢授江西南安府通判洊擢

州知府擊猾吏清帑金理冤獄尋署南昌道歷有賢聲以權貴

忌左遷藩府長史乞養歸

鳳陽府志舊志

宏光時授南昌道監左軍

不就著有庭訓十義史辨濠上吟志草祀名宦鄉賢

何國祥家世牧略

新

朱銘字自新壽州恩貢知南漳縣廉明多惠政士民肖像以祀

壽州志

國朝劉允謙字六吉壽州人順治丁亥進士知沈邱縣英敏廉介

以教養士民爲務縣河底有石壞舟募民鑿去商民立祠河畔

擢山東巡按

一統志河南名宦

鄧旭字元昭壽州人順治丁亥進士授翰林檢討辛卯典試江

西得人稱盛會

詔舉品行清端才猷贍裕可任外吏者大臣以旭薦遂擢陝西洮岷兵備道按察司副使未幾引疾乞歸卜築清溪性至孝以父汝謙早歿痛祿不及養言及輒流涕又孜孜爲善凡賑荒修學贖難婦育棄嬰諸有益於地方者不惜變產爲之生平持正侃侃詆斥異端人見其和光同塵而實有壁立千仞之槩所著有林屋詩集九卷

江南舊志

歐陽明憲字章卿宿州拔貢順治中知詔安縣平環沙寇蔡四踞烏山流劫遠近明憲定計搜捕脫囚繫男婦百餘人搗其穴葺學宮課諸生邑人銘德至今稱賢令者曰猶得見歐陽也

一統志

福建名宦

丁珩字朗山宿州人歷官戶部郎中遷漢興道正己率屬一郡

肅然歲饑借倉穀數千石賑之全活甚多及卒士民號泣如喪

所親

江南通志

丁啟明字東有宿州歲貢知定興縣清民田興學校革雜派招流亡在任六年善政不可悉紀

宿州志

田家修字獻之鳳陽人順治中知從化縣時兵燹之後力爲撫綏安集流亡諭降盜賊十餘寨勸令開墾復爲良民清刑簡訟殘黎以安

一統志廣東名宦

沈時鳳陽人隨征入粵授永安知縣順治四年流賊攻城親冒矢石築子城造雲車以禦衝突閏三月援兵至圍解擢知潮州府歷糧儲驛傳道所至民懷其德

一統志江南通志

楊模聖字揆一懷遠人順治己丑進士歷官濂州知府時土弁

縱橫模聖單騎招降劇寇安輯遺民去任士民泣送

江南通志

夏人佺字敬孚壽州人順治己丑進士知夏津縣擢御史有直

聲成俄請蠲賑疏積逋任鹽院清潔自矢乞休歸

壽州志

何國祥字紫雲定遠人陞之以選貢官雲南易門知縣新罹
兵火巷無居人國祥招集流亡漸復其舊時推官奉裁滇多疑
獄悉委國祥多所平反以艱歸起補浙江歸安縣蠲除苛政與
民休息廉獲賊首李成龍一方晏然入爲兵馬司正指揮致仕

鳳陽府志

舊志易門立有遺愛碑著有壯游草紀游編家世敘略祀

名宦鄉賢祠

蕪洲輿頌
新增

吳懷忠鳳陽歲貢由青縣教諭擢知任縣任有澧蔡諸河古大
陸澤也自元郭守敬濬後浸失故道親履相度得其原委疏濬
復舊民利賴之升連平知州以老乞休

鳳陽縣志

劉黻字紫脫鳳陽人順治辛丑進士知定襄縣治獄明決訟者

衰息南中用兵供億紛沓隨方處置動合機宜擢知隴州隴經殘破居民鮮少招集流亡漸復舊業又請履畝定稅隴賦得減凡可除民害者必力爭之艱歸遂不起

鳳陽縣志

孟凌雲字連青鳳陽選貢爲廬江教諭釐正文體課士有方勸修學宮捕蝗救荒佐縣行之皆以實心行實政卒於官

鳳陽縣志

謝開寵字晉侯壽州人順治己亥進士知宜賓縣潔己愛民案無畱牘以艱歸

壽州志

范明德壽州人康熙六年爲大名府通判制府幕士犯罪明德按治之其人走愬制府明德曰某守法吏敢以上官撓法耶卒於官貧不能斂士民傷之

一統志直隸名宦

方遂字綸賁壽州舉人知岳陽縣廉以律己慈以惠民建學修城威饑請賑訪獲積盜捕虎息患邑民作歌頌之

壽州志

丁育果字去暗宿州人以貢生知麻陽縣山寇盤踞聯保甲嚴
斥埃殲其魁羣盜斂跡委署鎮草通判生苗出入爲民害單騎
入其境詰責之皆畏服奉約束復本任麻有鬼大王祠男女信
奉奸宄伏匿命毀其像投之河民大駭育果曰吾自當之不汝
殃也又資修黌宮立義學請廣學額四名士風丕振麻有船五
千艘歲納銀五錢悉革去以勤勞卒於官

宿州志

俞化鵬字扶九壽州人康熙辛未進士知甯海縣有惠政擢御
史歷至順天府府尹鐵面冰心不避權貴坐是致仕歸

壽州志

方一韓字殿西壽州人康熙乙丑進士知峽江縣地多盜賊設
法捕緝夜不閉戶在邑三年政簡刑清囹圄一空以病乞休士

民號泣攀留

壽州志

凌森美字聖西定遠人康熙時以拔貢教習知廣西貴縣獠獍

雜處素好剽竊爲創築土城小江口而環溝之民得無患調永
清興學校鋤奸暴夷戢民安升雲南霑益州知州卒貴永皆祀
之名宦

定遠縣志

苗潔字景雪定遠人以貢授太平訓導自出資修學邑眾踴躍
得復舊制工竣眾欲以餘資葺其宅潔笑曰是吾以數百金市
諸君爲美宅也猶有先人之敝廬在遂告歸

定遠縣志

凌熇字約銘定遠人康熙癸巳舉人雍正間考授內閣中書累
升至監察御史巡察直隸等處平反冤獄天津漏報水災親勘
得賑擢江西按察使

恩賜御製詩章

御銘石硯貂皮等件有魍魎仙邪術惑眾案誅首惡免株連又有以報
母齋私刻印信愚惑鄉村捕罪其魁而諭散之以請養歸沿途

感送者不絕

定遠縣志

王遂字士瞿定遠人幼孤以孝母聞雍正初舉孝廉方正以知縣分發貴州題補貴筑適有苗變羽書旁午躬勞動裁陋規民不知擾會母卒上憲以軍興不聽去援例奏請在任守制升永甯州乃抱疾奔馳煙瘴中會剿黃平餘慶等處賊巢安撫降脇流民以勞致疾升南籠知府軍事既竣請假歸葬數月而卒

定遠縣志

縣志

王業字稼田定遠人雍正初舉孝廉方正薦知維南縣調中部多善政培植學校敦勸農桑中部乏水爲創渠堰資灌漑以勞致疾告歸

定遠縣志

鮑成龍字鱗長臨淮選貢分發四川署漢州知州革陋規五六千金首捐資修金雁橋邑人立石頌德題補縣竹創建書院調

成都升緜州知州遷打箭爐同知值剿瞻對委署雅州知府督糧餉金川亂賊去爐僅十五里城中惟土兵六十人出庫貯旗幟布列城堞賊疑而引退以論軍務忤總督意籍產經略大學士傅恆廉得實獲昭雪補瀘甯同知調松江獲海盜五十餘人卒於官

鳳陽縣志

方時寶壽州監生考授州佐揀發黔省苗民不靖上書於經略張廣泗陳十策多見施行奉委監運糧儲獲叛犯設屯堡強幹有爲授開泰知縣卒年八十一

壽州志

凌奎發字蘊華定遠廩貢任真定府經歷委查灤河源流持檄出塞悉圖其經流及所受大小水曲折參之經傳各水利書辨正水經得失而爲之說還報僅七月其任成安時以水請賑不許固爭大吏知其誠許之既卸篆仍委之賑活人無算委署靈

壽縣喜曰此陸稼書甘棠之舊也至則詢所廢墜者盡復之尋

以疾卒

定遠縣志

方焯字映南定遠歲貢授通判分發湖北歷署黃州鄖陽補襄陽皆以廉幹稱委署通城邑號難治推誠導諭數月而訟稀笑曰誰謂俗悍頑者縣距省五百里多山險糧運爲艱詳請納折民困得蘇以艱歸起補順慶通判攝理番府事時討西藏土番焯司站運公相福康安嘉其能使攝峨眉令事縣多鄉番常構衅焯寬猛互濟夷輯民安又歷署油江合江等處恆派督餉時教匪滋蔓勛鄉勇拒守有倚無患福將保奏以老疾辭歸卒年

八十二

定遠縣志

徐瑄靈璧拔貢乾隆二十一年任福建龍溪縣丞分駐華封有意興文教方授簡延紳士議立義學值亢旱隨居民徒步禱雨

福里潭往返烈日中竟以是得疾卒

福建通志
新增

方煒字燮和定遠人乾隆壬辰進士改庶常授編修嘗充四庫全書分校官書成

賜如意雜佩箋紙等件授左春坊左贊善轉中允歷司經局洗馬兼翰林院修撰戊申典試山西稱得士出爲浙江督糧道改江西調劑糧務五事呈請

詔可又署江南鹽巡道補河庫道睢工漫口奉委專辦收放事時稱北門管鑰辛亥春督放徐州賑恤徐民愛戴至今頌聲不衰

定遠縣志

宮兆麟字伯厚懷遠人由貢生授安陸府通判築沔陽州隄水患以息歷升興化知府署興泉道興水利立學校建育嬰堂養濟院凡利民之事知無不爲升山東濟東道歷雲南布政使緬匪跳梁籌運糧餉往來接濟晉廣西巡撫調湖南又調貴州桐

梓刁民聚眾滋事借湖廣總督吳達善緝捕正法古州苗民香
要不法復偕吳達善捕誅之條上善後五事皆如所請尋以事
降甘肅按察使復以貴州任內事革職乾隆四十一年

上東巡兆麟迎

鑒賞給三品銜四十六年卒

懷遠縣志

方典字漢桓懷遠選貢授東安縣丞升霸州判廉幹勤慎見稱
於時承辦永定河務潔己奉公有能名河工之暇親督河夫耕
種河邊隙地以屯田法教之遂多收穫以艱歸卒典性至孝先
是母卒哀毀幾至滅性方苞嘗稱之爲宇內完人

懷遠縣志

宮綺岫懷遠人官餘慶知縣升南籠知府多善政嘗署姚州台
拱皆新定苗地獐獍雜處訓之以義爲定婚葬禮漸化其俗台
拱立生祠祀之

懷遠縣志

李彩字雲章壽州人官化州知州粵俗勾婦每數十百人成羣
填塞街市民甚苦之彩以理曉諭俗爲之變歲荒悉心賑救遷
廉州府同知卒於官百姓巷哭次子程蓮在籍聞訃藹足走五
千里踰險冒瘴扶輓南歸後以援例授縣丞歷官至海門同知
鋤強暴理斥鹵雪冤沈計擒洋盜數十人擢天津知府署天津
兵備道致仕歸

壽州志

劉崧秀字鳳綸定遠人乾隆癸卯舉人初以選貢官石埭訓導
後爲江蘇嘉定教諭捐俸葺書院增膏火縣有新涇河歲發帑
以溶承委者每增派民錢數千緡以爲常制府汪志伊專以委
崧秀乃以市價傭計畚鍤盡徙其淤岸外數里五閱月而工竣
並歸其羨自云可十年無患免歲溶之費以疾歸卒嘉定來會
葬者曰至今未嘗議溶蓋閱三十餘年矣

定遠縣志

方積字慶餘定遠選貢授州判署梁山令時教匪蹂躪梁萬開
積能以少擊眾先剿妖賊王正文於萬縣寶蓮寺又屢敗賊於
狐狸嶺荆竹園等處建堅壁清野之議賊無所掠多自解散累
升至四川按察使偕豐提督紳往征馬邊峨邊諸叛夷鑿道度
師深入險阻諸夷懾服晉布政使以疾卒官成都紳士立祠祀
之又祀鄉賢

定遠縣志

李東暇靈璧人乾隆乙卯舉人由臚錄議敘選授伊陽知縣嘉
慶間歲饑捐賑爲糜以食餓者全活無算委署汝州調知河內
縣地當丹沁二水入黃詳明築隄四十餘里境及四鄰得免水
害者八縣居家倡建文昌宮又修靈壁學皆不惜重資士林稱
之

靈璧縣志

薛傳仁字統四壽州人乾隆丁卯武舉官奇兵營千總所轄濱

大江風濤溺人傳仁捐俸設救生船自是無覆舟致死者累擢
漕標左營都司悉漕利弊嚴寒盛暑馳逐河干升右營遊擊歷
署中營副將卒於官

壽州志

桓楷字範亭懷遠舉人歷署羅山臨潁偃師溫縣皆有善政嘉
慶十八年滑匪跳梁官兵雲集派運糧餉供給罔缺積勞成疾
卒從兄樅以軍功議敘官獨山州同虛衷聽斷卒之日苗民無
不流涕

懷遠縣志

楊如蘭懷遠舉人分發山東堂邑淫雨市月居民漂沒奉檄勘
查卽日具乾餒乘馬日行泥淖中水沒馬腹兩足皆腫扶病按
大小口給糧曰此以救旦夕水定再議賑卹也百姓扶老攜幼
皆牽衣泣下壽張饑大吏謂如蘭曰非君行不可顧何以善其
事對曰但無私耳旬月奏効補知臨邑以計盡擒諸盜鄰邑皆

安卒於官

懷遠縣志

楊新蘭字懷亭懷遠舉人知長山縣辦理周村私銷案以賢能稱調蒞澤擒盜梟升東平知州挑小清河水患以息署水利總捕同知值教匪滋事採辦軍需不辭勞瘁調濮州兵燹之後招撫流離設場施粥以勞卒官

懷遠縣志

郭世安字汝磐鳳臺舉人知靈邱縣年已七十矣所用胥役皆擇椎魯人每謂事權當操之己役供使令而已何用智巧叢蠹為蒞官十年政靜以和民咸愛戴建太白書院以古法教學者士蔚然興罷官卒於寓舍士民為之立祠

鳳臺縣志

孫克俊字繼三壽州廩生嘉慶戊午川楚軍興以助餉議敘授

刑部郎中勾檢庶獄同官倚重奉

旨以知府用請假回藉值蒙宿教匪滋事馳赴軍前協力剿捕事平議

敘加級又遵例加捐道員未選以事牽里謫軍台効力卒於戍

所壽州志
以上舊志

王蘊葵字勁堂靈璧人嘉慶中歷官貴州石阡府知府有治績

以憂去士民立生祠祀之靈璧縣志
以下新修

陳鍾芳字潤森定遠進士歷官吏部郎中咸豐中隨桂良等赴

淀津辦洋務又隨增慶辦奉天海防悉合機宜蒙

恩以五品京堂候補差旋道卒定遠縣志

余鴻祖字秋湄壽州舉人官雲南浪穹知縣臨安高匪之案鞠

俘囚無所枉縱升署元江知州決諸苗讐殺積案威信甚著道

光中署趙州知州修隄濬渠水利甚溥卒官子士堞字菊農由

進士官浙江西安知縣勸民務農刊教稼書備載糞田灌漑之

法洊擢嘉興府知府籌賑水災倡辦米捐終江蘇常鎮道卒於

軍營咸豐開

贈太僕寺卿邱廕如例

壽州志

何錫九字敘疇一字訪亭定遠舉人由大挑知縣改選江蘇崑山教諭修學宮立灑掃會倡捐田二十頃爲書院經費勤於課士搜訪孝義節烈彙請

旌表建文星閣濟文曲河道光壬寅佐知縣練勇捍禦海氛疊遇水災分俸助賑邑人感之在任七年卒官合祀於前明教官堵應之祠道光三十年奉

旨入祀名宦

定遠縣志

以子廷謙官

贈儒林郎翰林院編修晉光祿大夫工部左侍郎加三級

狀行

林鼎奎字默菴懷遠舉人官貴池訓導修學宮立義學道光甲

午捐俸煮粥救饑民著有聽雨軒詩集

懷遠縣志

凌樹荃字湘圃定遠舉人官福建鳳山知縣剿擒盜黨數十人

又擒逆黨呂青蓮升同知署彰化力疾任事卒於官

定遠縣志

孫家酈字鴻卿壽州進士內閣中書選四川石砭廳同知咸

豐七年擊退石涪教匪擒范德信等七十餘人匪首馬錦明竄

涪州追擒之以功擢知府守綏定解達縣民變攻渙匪於新甯

復其城積勞卒官在石砭惠政尤多廳人請祀名宦

壽州志

張景賢字牧南宿州人軍功江蘇知縣以直隸州知州用加知

府銜署桃源縣創築土城修學宮置祭器增書院葺火署邳州

募勇緝捕姦宄遠迹重整書院如桃源時後卒於軍營奉

旨加太僕寺卿銜廕子入監同治八年祀桃源名宦

宿州志

韓承宣字啟宇懷遠舉人官河南新蔡知縣咸豐十一年土匪

陳大喜時龍書先後圍犯縣城俱擊走之同治元年逆黨僧諦

宣揚方術鉤結髮賊偏城而壘爲地道百計環攻城垂陷承宣
隨方堵禦凡四十餘日力保危城以積勞歐血卒初承宣在皖
營以軍功

賞加同知銜侃勇巴圖魯及是照知府軍營立功例

贈太僕寺卿銜廕子知縣四年奏准在新蔡建立專祠

懷遠縣志

重修安徽通志卷一百九十八

人物志

宦績二十一

潁州府

漢何比干字少卿汝陰人學尚書於晁錯經明行修兼通法律
爲縣獄吏決曹掾平活數千人武帝時爲廷尉正與張湯同時
湯持法深而比干務仁恕數與湯爭雖不能盡得然所濟活者
以千數後遷丹陽都尉獄無冤囚淮汝號曰何公

後漢書何敞傳何氏家傳

郭憲字子橫汝南人王莽篡位拜憲郎中賜以衣服憲焚之
而逃於東海之濱光武卽位徵爲博士再遷至光祿勳車駕西
征隗囂憲當車以刀斷軛帝不從後潁川兵起乃還歎曰恨不

用郭子橫之言匈奴犯塞諫爭不合帝令兩郎扶下殿憲亦不

拜帝曰常聞關東舳舳郭子橫竟不虛也後漢書本傳

許楊字偉君汝南平輿人王莽篡位變姓名匿它界莽敗還鄉

里舊有鴻卻陂成帝時翟方進奏毀之建武中太守鄧晨欲修

復其功聞楊曉水脈召與議之署爲都水掾使典其事因高下

形勢起塘四百餘里數年乃立百姓得其便累歲大稔後病卒

晨爲起廟百姓皆祭之後漢書本傳

許敬字鴻卿平輿人順帝時官光祿勳永建二年七月司徒朱

伥罷以敬代之四年十一月免以千石祿終身後漢書順帝紀及章懷太子注

虞詡字升卿陳國武平人爲朝歌長賊甯季等數千人攻殺長

吏州郡不能禁詡到官募士得百餘人設伏以待遂殺賊數百

又潛遣能縫者傭作賊衣以采縫縫其裾爲識有出市里者吏

輒禽之由是駭散咸稱神明歷遷武都太守羌率眾數千遮詡於陳倉詡卽不進宣言請兵始發羌遂分鈔傍縣詡因其兵散日夜兼行令日增兩屯羌不敢逼到郡以計大破羌通運道招流亡後遷尙書令以公事去官子恭有俊才官至上黨太守

書本傳

陳蕃字仲舉平輿人徵拜議郎遷樂安太守梁冀遣書詣蕃有所請託不得通使者詐求謁蕃怒笞殺之後爲大鴻臚以疏救白馬令李雲免官復徵拜議郎遷光祿勳至太尉上疏救劉瓚成瑨等帝怒不納宦官由此疾蕃彌甚竇武謀誅宦豎事泄曹節等矯詔誅武遂并執蕃卽日害之

後漢書本傳

許劭字子將平輿人初爲郡功曹太守徐璆甚敬之與從兄靖俱有高名好共覈論鄉黨人物每月輒更故汝南有月旦評焉

卒於豫章兄虔亦知名汝南人稱平輿淵有二龍焉

後漢書本傳

許靖字文休平輿人舉孝廉除尚書郎典選舉董卓秉政奔揚州孫策渡江又走交州劉璋招之靖遂入蜀先主克蜀以靖爲長史及爲漢中王拜太傅卽尊號策爲司徒年踰七十愛樂人物誘納後進丞相諸葛亮爲之拜章武二年卒

三國志本傳

按平輿非今潁州地詳古蹟平輿故城條下

魏夏侯惇字元讓沛國譙人年十四就師學人有辱其師者惇殺之由是以烈氣聞曹操初起惇常爲裨將領陳晉濟陰太守加建武將軍封高安鄉侯大旱蝗起乃斷大壽水作陂身自負土率將士勸種稻民賴其利文帝卽王位拜大將軍卒

三國志本傳

夏侯惠字稚權淵之子也幼以才學見稱善屬奏議歷散騎黃門侍郎與鍾毓數有辯駁多見從遷燕相樂安太守卒年三十

七三國志本傳並注

吳呂範字子衡汝南細陽人避亂壽春孫策見而異之遂歸策從破廬江還俱東渡領宛陵令討破丹陽賊自請遷都督委以眾事軍中肅穆威禁大行後權征江夏範與張昭畱守曹操至赤壁與周瑜等拒破之拜裨將軍領彭澤太守權都武昌拜建威將軍封宛陵侯領丹陽太守治建業初策使範典主財計權私有所求範必關白後權統事以範忠誠彌見親信遷大司馬

三國志本傳

晉丁紹字叔倫譙國人少開朗公正爲廣平太守政平訟理道化大行臨漳被圍南陽王模窘急紹率郡兵赴之城賴以全遷徐州刺史士庶戀慕攀附如歸復轉荊州刺史渡河至許時南陽王模爲都督畱紹啟爲冀州刺史率州兵討破汲桑加甯北

將軍假節監冀州軍事紹自以爲才足爲時雄視天下之事若
運於掌握遂慨然有董正四海之志永嘉三年暴疾而卒贈車

騎將軍

晉書
本傳

齊夏侯恭叔譙國人垣崇祖在豫州聞其才義辟爲主簿兼掌
書翰高帝卽位方鎮皆有賀表王儉見崇祖啟咨嗟良久曰此
恭叔辭也崇祖爲武帝所誅故人無敢至者獨恭叔出家財爲
殯時人以比樂布後爲竟陵令惠化大行木連理上有光如燭
咸以爲善政所致

南史
本傳

梁夏侯詳字叔業譙國人年十六父喪廬墓有三足雀來集其
廬服除刺史殷敬珉召補主簿宋太始初敬珉以豫州叛明帝
遣劉劭討之詳勸令歸款一州以全令新汲治有異蹟梁武帝
起兵以詳爲中領軍南郡太守軍國大事多決於詳天監元年

徵爲侍中封甯都縣侯改封豐城縣公遷湘州刺史善吏事爲百姓所稱徵爲尙書左僕射道病卒贈開府儀同三司諡曰景

梁書本傳
南史本傳

夏侯誼字元龍詳之長子累遷南郡太守父憂解職居喪盡禮遺財悉推諸弟起爲司州刺史領安陸太守服闋襲封居州甚有威惠遷吳興太守在郡復有惠政吏人圖其像立碑頌美焉裴邃攻壽陽功未成而卒乃加誼使持節代邃與魏相拒頻戰克捷降城五十二以誼爲豫南豫二州刺史加都督輕刑薄賦務農省役民戶充復卒諡曰襄二子誼損誼襲封侯景入寇誼與弟損率部曲入城並卒圍內

梁書本傳
南史夏侯詳傳

夏侯夔字季龍誼之弟也累遷司州刺史領安陸太守帥將出義陽道攻平靜穆陵陰山三關剋之又自武陽會湛僧智降魏

將元慶和走魏將元顯伯及郢州刺史元顯達降詔改爲北司州以夔爲刺史封保城縣侯大通六年爲豫州刺史加督積歲連兵人多失業夔乃於蒼陵立堰溉田千餘頃歲收穀百餘萬石境內賴之夔兄亶先經此任兄弟並有恩惠百姓歌曰我之有州頻得夏侯前兄後弟布政優優卒諡曰桓子謚嗣官至太僕卿

南史夏侯詳傳

北魏夏侯道遷譙國人單騎歸魏拜驍騎將軍後以功封濮陽侯歷華瀛二州刺史爲政清嚴善禁盜賊卒贈雍州刺史諡曰

明

北史本傳

董紹字興遠鮑陽人好學有文官中書舍人爲宣武所賞豫州城人白早生以城南叛詔紹慰勞爲賊鎖禁送江東梁武使勞之曰忠臣孝子不可無之今當聽卿還國乃引見之謂曰戰爭

多年人物塗炭若欲通好以宿豫還彼彼當以漢中見還及紹
歸雖申說和計魏不許除洛州刺史頗得人情以拒蕭寶寅功
賞新蔡縣男孝武西遷除御史中丞後爲周所害

北史本傳

唐張路斯穎上人景龍中宣城令墾土田通水利至今城北有

張路斯田

集古錄張龍公碑跋

舊

新移

奚陟字殷卿亳州譙人祖乾繹天寶中弋陽郡太守陟登進士

第又登制舉文詞清麗科授宏文館校書至左拾遺後歷金部

吏部郎左司郎中累奉使皆稱旨擢拜中書舍人江南淮西大

雨爲災令陟勞問巡慰所在人安悅之遷刑部侍郎裴延齡惡

京兆尹李充有能政誣奏充結陸贄數賂金帛又奏充妄用京

兆府錢穀至多請令比部句覆郎中崔元翰曲附延齡劾治府

史笞決立威欲以陷充陟乃躬閱府案具得其實奏言度支所

奏李充所妄破用並是準敕及度支符牒給用已盡元翰不得遂其志憤恚而死陟尋以本官知吏部選事銓綜平允遷吏部侍郎貞元十五年卒贈禮部尚書

舊唐書本傳

夏侯孜字好學亳州譙人累遷婺絳等州刺史由兵部侍郎諸道鹽鐵轉運使爲同中書門下平章事仍領鹽鐵懿宗卽位進門下侍郎譙郡侯俄以同平章事出爲西州節度使召拜尚書左僕射進司空爲貞陵山陵使出爲河中節度使咸通時南詔蠻變犯蜀深入士乏糧追責孜治蜀無備以太子少保分司東

都卒

唐書本傳

周李穀字惟珍潁州汝陰人少以任俠爲事後發憤從學所覽如宿習舉進士晉天福中擢御史歷漢仕周開國之初倚以爲相世宗征太原命穀先調兵食師還進位司空門下侍郎監修

國史河決齊鄆發丁壯塞之命穀領護刻期成功議伐南唐時請罷兵爲便穀手疏親征有必勝之利者三世宗大悅用其策及淮南平出穀疏命陶穀爲贊以賜之抗表乞骸骨罷相守司

空恭帝卽位加開府儀同三司進封趙國公求歸洛邑從之宋

建隆元年卒

宋史本傳爲宋官未可列之於宋宦中也故仍繫之於周

按李穀雖卒於宋名在宋史實未嘗

宋張綸字公信汝陰人官三班奉職遷右班殿直從雷有終討

王均於蜀有降寇數百據險叛使綸擊之綸曰不如諭以向背

用其說果棄兵來降遷益彰簡等州都巡檢部卒縱酒掠民立

斬首惡數人眾乃定歷江淮制置發運副使時鹽課大虧奏請

除其宿負助其器用增課數十萬石復置鹽場於杭秀海三州

歲入課又百五十萬石居二歲增上供米八十萬疏五渠導太

湖入海復租米六十萬開長蘆西河以避覆舟之患又築漕河

隄二百里於高郵北旁錮巨石爲十礎以泄橫流泰州有捍海堰百五十里久廢不治綸議修復論者難之表三請願自臨役命兼權知泰州卒成堰復逋戶二千六百民利之爲立生祠再遷東上閣門使徙知潁州卒

宋史本傳

王臻字及之汝陰人舉進士歷殿中侍御史擢淮南轉運副使時發運司議濬淮南漕渠廢諸堰臻言揚州召伯堰實謝安爲之不可廢濬渠亦無所益召爲三司度支判官卒濬渠以通漕臻坐異議降監察御史知睦州道復官徙福州州鬪者多先食野葛趨仇家求鬪旣死以誣人臻辯其誣往往釋之俗爲之變仁宗卽位累遷尙書工部郎中權御史中丞卒臻剛嚴善決事所至有風跡

宋史本傳

張傳字巖卿祖播爲亳州團練使子孫遂爲譙人傳進士及第

知奉符縣以修會真宮天書觀及增治岳祠薦知楚州會歲饑不待報發上供倉粟賑貸所活萬計因拜章待罪詔獎之除江東轉運使歷官至工部侍郎卒傳強力治事七爲監司所至審覈簿書句摘奸隱州縣憚之傳曰此正所以愛州縣也更不敢慢則州縣不復犯法矣人亦以爲然

宋史本傳

魯宗道字貫之譙人舉進士爲濠州定遠尉再調海鹽令縣東南舊有港導海水至邑下歲久湮塞宗道疏之人號魯公浦天禧元年始詔兩省置諫官六員首推宗道爲右正言多所論列帝意頗厭因請對自訟竊恥尸祿請得罷去帝撫諭良久他日書殿壁曰魯直仁宗卽位判吏部流內銓患銓格煩密及知吏所以奸狀多釐正之拜右諫議大夫參知政事章獻太后臨朝問宗道曰唐武后何如主對曰唐之罪人也太后默然時有請

立劉氏七廟者太后問輔臣眾不敢對宗道曰不可若立劉氏七廟如嗣君何帝太后同幸慈孝寺欲以輦先帝行宗道曰婦人夫死從子太后遽命輦後乘輿曹利用恃權驕橫屢於帝前折之貴戚用事者皆憚之目爲魚頭參政再遷禮部侍郎病劇帝臨問卒贈兵部尙書諡曰剛復改肅簡議者以爲不若剛之得實云

宋史本傳

張信臣字公立亳州人授浦江尉大旱齋禱白石山三日而雨吏民立祠於山側調譙縣主簿升知長洲縣嚴禁屠牛又爲泗州招信縣濱淮盜賊聞其至皆遁去後爲遂州通判州民李十師以左道惑眾遠近患之信臣發其罪遂人以安瀘井清井鹽苦羣蠻抄掠欲障塞以限內外眾不敢往信臣奉檄毅然冒暑就道至則召酋長諭以威德正其疆界壘成而邊患絕

江南通志

州府志

高士林字才卿蒙城人宣仁聖烈皇后之弟也官內殿崇班殿直喜儒學涉經史嘗監揚州召伯廂稅木舊用火印士林改刃其印文鑿以爲識尤簡便旁郡皆效焉

宋史高遵裕傳

嘗有開字元翰宗道從子也以蔭知韋城縣曹濮劇盜聞其名不敢入境調知確山興廢陂溉田數千頃富弼薦之以爲有古循吏風知金州有蠱獄當死者數十人疑其眾訊之果誣時天方旱獄白而雨新法行有開自南康軍代還安石問江南如何答曰其患當在異日以所對乖異出通判杭州知衛州水災人乏食貸常平錢粟與之且請蠲其息徙冀州增隄明年河決水果至不能冒隄而止朝廷遣使河北民遮道誦其功後官至中

大夫

宋史本傳

常秩字夷甫汝陰人屏居里巷以經術稱嘉祐治平中累命以官皆不受神宗卽位三使往聘始詣闕帝問何道可免民於凍餒對曰法制不立庶民食侯食服侯服此今日大患也拜右正言卒贈諫議大夫秩平居爲學求自得同里王回名士也每見秩與語歆然自以爲不及

宋史本傳
潁州府志

曹穎叔字力之譙人進士及第歷夔州路轉運判官夔峽尙淫祠人有疾不事醫而專事神悉禁絕之教以醫藥累遷右司郎中爲陝西都轉運使自慶厯鑄大鐵錢行陝西民盜鑄不已穎叔請罷鑄以三鐵錢當銅錢之一從之兩川和買絹給陝西兵而蜀人苦於煩斂穎叔爲歲出本路絹錢五十萬以易軍衣之餘者兩川之民始無擾焉後知永興軍卒於官

宋史本傳

高遵惠字子育蒙城人以蔭爲供奉官熙甯中試經義中選

大理評事元祐初上書言法度更張事有當否如先帝施設未

可輕議擢太僕少卿歷官戶部侍郎以龍圖閣直學士知慶州

卒

宋史高遵裕傳

王定民亳州人元祐中知衡陽縣兼權教授修葺學宮撰勤學

文以告多士士皆知奮

一統志湖南名宦

張允蹈譙縣人隆興二年以朝請大夫知興化軍事先是延建

汀邵山寇起轉運使暫移本軍苗米二萬五百石輸省會以佐

軍興已遂沿爲成例名猶賸米民不勝病允蹈狀於朝蠲其半

福建

通志

新增

高世則字仲貽蒙城人幼以恩歷官閣門祇候宣和末金泛使

至命掌客世則記問該博應對有據自是掌客多命之金人軍

城下邀親王議事高宗在康邸請行世則以副使從高宗艱難

中世則嘗在左右大元帥府建政府參議官請布檄諸路以定人心及卽位詔編類元帥事迹付史館帝念宣仁后保祐三朝外家班秩無顯者以爲盛德軍節度使進開府儀同三司奉朝請兼判溫州以病告罷進少保卒贈太傅諡忠節宋史高遵裕傳

高子潤蒙城人爲烏程主簿疏三十二澳達於湖復晉宋舊蹟民賴其利一統志浙江名宦

金郭通亳州人大定元年擢陝西路轉運使都句判官時晉絳戶稅轉運平涼通監視之官吏無敢秋毫犯後爲絳陽軍節度副使父老咸曰此昔平涼閔恤我曹者也期年大治絳人繪像於天甯寺舍立石紀德終清河防禦使山西通志

王賓字德卿亳州人貞祐二年進士爲人外若曠遠而深有謀畫天興元年亳州楊春爲變節度使鈕祐祿荆山力屈出走賓

與前譙縣尉王進魏節亭呂鈞約城中軍民復其州楊春遂遜

事聞哀宗嘉之授同知集慶府擢刑部尙書

一統志
潁州府志

元呂謙字和之亳州人從巴延南征拜將軍鎮守上海當春勸

農召父老謂曰善牧羊者先去敗羣善治民者先除民病里胥

畏憚境內肅然

南畿志

蔣文煥字彥章蒙城人至正閒尹於濳縣當兵凶疾疫之餘專

以招徠撫字爲務

浙江通志

章克讓潁上人元統閒進士任繁昌尹明敏果斷謝事歸里四

壁蕭然

潁州府志

程元直亳州人至元閒爲交城尹勸農興學政平訟簡升絳州

守祀名宦

山西通志

顏高太和人察罕將也善論兵察罕死爲庫庫進據陝西後見

庫庫不受朝命列其罪狀聞於朝賜號忠義功臣知樞密院兼

平章總河北軍事

明史及元史類編作庫庫特穆爾

明安然潁州人本自祥符徙元季以左丞守萊州明兵下山東率眾歸附累官山東參政撫綏流移俸餘悉給公用洪武二年召爲工部尙書出爲河南參政歷浙江布政使人爲御史大夫改左中丞坐事免未幾設四輔官以然爲之然久歷中外練達庶務眷注特隆十四年卒帝念其誠親製文祭之

明史本傳

蕭鵬舉名翀以字行南直太和人洪武中以賢良應製賦指佞草詩稱旨授蘇州府同知轉山東運使正直清廉官聲第一

山東志

通志

李敏潁州人洪武五年由辟舉爲工部尙書改江西行省參政

九年復除工部尙書居官有聲卒賜祭葬

江南通志

竇松潁州人洪武初由辟舉任監察御史雅尚節操有冰檠聲
同州樂世英亦由辟舉入仕歷任有聲官至四川布政使又盧
彥昭潁上人以隱德聘爲四川布政左參議有風采吏畏民懷
陳居敬蒙城人以貢歷官至戶部侍郎居官清慎所至有政績

潁州府志

吳斌霍邱人由太學生擢刑部主事持法不撓洪武二十八年
爲都察院左都御史

明史七
鄉表

章順舉字元凱潁上人洪武中以人才薦累官河南布政使有
奇績尋調廣西吏畏民懷

江南通志

張泌字淑清潁上人洪武中由歲貢授兵科給事中永樂時爲
光祿寺卿勤於其職既歿吏部每除光祿寺官成祖必問得如

張泌否

一統志

引思蒙城歲貢授刑科給事中有暮夜以金遺者卻不受其人委金而去詰旦言於朝上嘉其有守升刑部侍郎馭下嚴明人畏服之嘗兼綜軍務鎮備邊防爲時名宦

江南通志

張璧蒙城人洪武初知潞城縣修舉廢墜招撫流移政行暮年

民懷吏畏

山西通志

陳巖蒙城人初名亮以薦召見賜名巖命招諭湖廣洞寇及境寇猝至巖無怖色宣諭德意悉羅拜又遣督逋租於常德察其土瘠民貧令輸鈔帛代之爲慈溪縣丞民困加賦奏免額外之征歷官台州府通判

江南通志

蔣學穎上人洪武中應求賢詔授伴讀仕至廣西左參政文章政事並稱一時同邑秋茂字可才由太學生授望江教諭升江西僉事調湖廣所至有政績又吳道東字文昇太和歲貢仕戶

部主事會計國用區處有方

府志

趙亮亳州人官慶雲縣典史督民耕織歲荒捐俸買穀以給貧

民升崇仁知縣盜息民安尋升撫州知府

江南通志

陳嘉慶潁上人永樂間以舉人知安陸縣精敏有才節縮甲里賦均徭簡乃酌畫其法名曰便民政略徧諭閭閻俾民不爲吏

胥所欺擢南工部主事鑄錢抽稅一塵不染升郎中

一統志湖北名宦

卜謙字宗讓潁上人永樂中以舉人授工科給事中嘗從皇太

孫監國南京忠於輔導丁內外艱廬墓六載宣德間直文華殿

學士事並見嘉納升陝西僉事轉山東副使左遷陝西參議

民間謙至歡迎者塞途尋以足疾致仕

萬姓統譜江南通志

韓璽潁州人以貢授工科給事中選侍皇長孫講讀日承顧問

尋遷山東按察副使宣宗御極思念舊人召還侍文華殿忤權

貴出爲廣東參政致仕自近侍至藩臬廉謹自持歸日室如懸

磬泊如也

萬姓統譜
江南通志

李湘字永懷南直太和人永樂時知東平州常祿外一無所取

嘗築城東戴村壩以除水患又督勸開荒墾田屬邑無不藝之

土會舊官當還任民乃詣闕請畱遂復任十餘年

山東通志

楊越太和人永樂中知臨武縣凡政不便於民者卽請罷之公

慎自持吏民畏服

湖南通志

王質字孟瑾太和人永樂中以舉人擢御史上疏陳十事時松

門有羣聚謀爲盜者奉命往察還奏止罪渠魁餘悉宥之正統

二年升山東布政使濟南多虎禱於神三日捕虎十七餘皆引

去累遷刑部尙書勤慎清約所食惟蔬糲人呼青菜王

一統志

李芳穎上人永樂乙未進士選庶吉士改刑科給事中宣宗數

御便殿與大臣議事芳言洪武時大臣面議時政必給事中二

人與俱請復其舊帝是之後以事謫海鹽縣丞

江南通志

關好文字志學太和歲貢任漢陽推官改河間府門無私謁獄

無畱滯孫洪亦由歲貢知樂城縣有善政

潁州府志

李秉字克儉潁上歲貢授戶科給事中直言敢諫升汝甯府知

府有惠政

潁州府志

貊安字治民太和人宣德中由歲貢知內邱縣興水利建洪濟

雲溪二橋民不病涉任滿民詣闕保留復任升泗州知州民祠

祀之

潁州府志

陳嶷字九峰蒙城人宣德中舉賢良方正授刑部照磨屢決疑

獄大學士楊士奇薦之擢御史巡按浙江風采嶷立蜀獠叛胡

濛舉嶷往剿嶷集將士授方略一戰而克升陝西副使

一統志

王維太和人正統中知巴縣鋤強植弱興利除害民愛戴之

南湖

通志

董策亳州歲貢知城武縣調邯鄲有牛馳入堂上若有控者視之角折因緝其人而杖之又湯陰縣吏以數驢負官銀過邯鄲爲賊驅一驢去取銀逐驢驢奔入縣策怪之使人隨驢任所之果入賊家吏方哀號而賊與銀已俱獲境內旱蝗禱於神忽有大鳥數千啄而盡之世頌董君三異

穎州府志

陳謨字古訓霍邱舉人景泰中知霑化縣有政聲又名顯字孔彰穎上歲貢任南陽通判歷升夔州同知所至有聲卒年百歲

有奇

穎州府志

郭昇字騰霄穎州人天順庚辰進士授工部主事督運徐州呂梁洪舊有巨石百餘船觸輒沈昇鑿去之裝岸以石板束以鐵

釘灌以石灰爲功甚鉅植柳濬井以濟行人挽者便焉值考課
軍民詣闕請畱擢郕中仍涖洪事維揚河淤運舟膠淺檄昇治
之昇疏淤滯至儀徵白塔河牐河溢則洩於江江漲則引於河
瀦蓄有法運道無阻升陝西參議未任卒今洪上有郭公祠

通志

陳釗蒙城舉人宏治間知臨海縣政尙簡靜一世宦與儒生有
爭以理折之勢莫能撓刑清賦省閭里晏然

浙江通志

王章字文顯太和舉人成化中知臨邑縣民有訟者一訊立辨
同邑陳貴以舉人知棲霞縣廉謹愛民有循吏風又劉忠以歲
貢署懷甯等縣所至清操自持吏民悅服

潁川府志

劉剛字宗柔太和舉人知壽張縣剖決如流邑有婦人改嫁而
死者兩家爭欲葬之判云生前改嫁已無戀子之心死後歸塋

難見前夫之面訟遂決其聽斷明決多類此

江南舊志

張守亨字嘉會潁州人宏治丁未進士知臨邑縣廉得巨猾劉

某等數十人置之法遷陝西華亭縣縣依山險多盜守亨設計

擒其魁盜遂息每春秋巡行田野勸民耕作月朔召耆民訪問

閭閻利病次第興除大旱步禱應時卽雨歲亦大稔

一統志

朱詮霍邱人以貢知寶豐縣洞寇擾境詮計獲其首斬之調渠

縣教民務本民德之爲立生祠後官至陳州知府

潁州府志

曾顯太和人宏治中知靖州課農桑革重耗舉動必求便民州

人立石頌之

湖南通志

盛雲字惟高潁上歲貢任日照縣主簿日照民不知耕教以樹

藝民立祠祀之同邑卜釗知臨朐縣勞心撫字民立德政碑

潁州志

府志

劉朝潁州人官新安縣丞治尚寬平遷德慶州判時藩司行部將至境獠人圍之朝馳入獠中諭以禍福圍乃解擢知興甯縣

乞養歸

江南舊通志

徐熙霍邱歲貢知巴縣縣多虎患舊令設機弇捕之愈甚熙盡撤其具齋沐告神虎遠逝

江南通志

姚相霍邱人以貢官三河牧廉潔自持歸日惟圖書數卷同邑姚偉以歲貢知交城縣潔已愛民歸橐蕭然又王臣以貢知博

平縣居官以廉介聞

潁州府志

儲珊字朝珍潁州人宏治己未進士知清江縣擢御史巡按山東抗疏奏劉瑾不法謫戍嵐州判瑾誅起南兵部主事擢浙江僉事劇賊王浩入亂桃源提兵剿之戰屢捷偶與上官左卽拂

衣歸

江南通志

高桂字月庵潁上人官德興永宸濠叛巡撫王守仁討之桂以

督餉功升萍鄉知縣引年歸

江府通志

周尙化太和人正德四年知邳縣強寇歷境修築土城竭力守

禦城賴以全

邳州志

重修安徽通志卷一百九十九

人物志

宦績 二十二

潁州府

趙廷臣太和人正德中知盧溪縣憫邑中賦役煩重條陳便宜

裁革冗役民免重困

湖南通志

曹聰字德威霍邱人正德甲戌進士歷戶部郎中屢以餉軍有功受金帛羊酒之獎者六同時孫崇德字一之太和舉人知遠

安縣升大名府通判亦以督餉功升廣東提舉

潁州府志

王確字介夫潁上舉人知餘杭縣有孫榮者被誣成獄確爲力辨得減死邑有志鈔本未成確爲成之餘杭有志自此始以艱歸後補東明以治河功擢知汾州力裁宗室暴橫在餘杭時嘗

卻餽金邑人爲建卻金亭以志之

浙江通志
江南通志

張光祖潁州人嘉靖壬辰進士知鉅鹿縣調上虞修白馬湖築海塘四十里民祠祀之擢御史巡按關中疏劾總制以下殺無

辜冒功者忤權貴意遂罷歸

江南通志

尙爵字淑仁潁州舉人知掖縣有道失環者責償逆旅主人爵白其冤遷永平通判灌園得金掩其封不取致仕歸爵性至孝父病藥石饘粥必親嘗便溺器必親滌歸後僻處村落不入城市

江南通志

盧晉字伯進潁州舉人知興國縣有寡婦訟虎食其子晉檄於

神虎自死遷重慶府通判

潁州府志

郭樑字大用太和歲貢官莒州判剛直不阿同僚貪墨必面斥之郡人逃移者多賴安輯

潁州府志

王謨字體文潁州人嘉靖壬戌進士授保定推官屯田使者逮
百許人羅織成獄謨有憂色母問故跪曰兒不能殺人媚人恐
失使者意以貽母憂母曰兒爲仁人我不能爲仁人母乎竟平
其獄擢給事中穆宗與諸奄至虎園前驅呵避正色斥之劾大
璫李璋又劾首相高拱出爲湖廣參議謫興平丞修洪口堰納
金山諸泉秦民賴之後官浙江僉事

江南通志

李學禮字子立潁州人嘉靖己未進士授戶部主事敷歷中外
三十年歲歉嘗輸粟活饑民萬餘又嘗開膠州河以利漕運乞

養歸

江南通志

陳懋昭字建中太和人嘉靖甲子鄉貢歷福建鹽運同知卓犖
廉靜時議開大田新港懋昭謂新港開則西路塞課且滯竟報

罷

福建通志
新增

王之屏字汝藩潁州人嘉靖乙丑進士知永嘉縣有異政晉戶

部郎升建昌知府誅瀘溪妖僧疏通錢法御史劉臺劾張居正

巡撫王宗載希居正旨欲殺之之屏力爭得減戍歷升雲南右

布政

江南通志

王希喆字希賢太和舉人知蒙陰縣居官清正邑有宦豪素恣

橫喆至斂敢在任日惟疏食每旦置數錢門外令隸卒買菜以

給

江南通志

許廷桂字世芳蒙城人嘉靖癸未進士知阜城縣擢御史劾宦

官七人觸大璫怒削職嘗奉差印馬疏請江淮折色一省皆頌

其德

江南通志

李維字國張蒙城人嘉靖丙辰進士知海甯縣倭寇犯境撫民

禦敵皆中機宜邑賴以安升南大理評事以親老歸

潁州府志

胡明善霍邱人正德辛巳進士知甯鄉縣剛直而審於聽斷鄰

邑有不平者爭乞爲理積穀近萬石以備賑濟擢御史

湖南通志

蘇偉太和人嘉靖中知來陽縣請歲支羨餘以建學宮在任僅

七月以艱歸邑人爲立去思碑

湖南通志

李元陽字仁甫太和人嘉靖丙戌進士按閩中疏請均徭之外

酌量輕省詔下其議

福建通志新増

潘孟時蒙城舉人官刑部郎中雪冤獄數百調戶部致仕

潁州府志

邱隅顧上歲貢判曹州管馬政卻常例千金改禹州奉檄決疑

獄者三有青天之頌

潁州府志

姜湧蒙城舉人知曲陽縣調武清地多內臣執法不阿

潁州府志

白夏字履中潁州舉人知靈石縣課爲三晉第一後遷直隸安

縣張居正病諸郡邑爲祈禱夏不肯列名遷汾州守汾有悍宗

爲民患夏東以法皆斂手去汾人尸祝之

江南通志

蘇湖太和人萬歷四年知海甯縣時值海嘯塘圯水溢漂沒廬

舍溺人無算巡撫徐枋議修築而難其人胡適至卽委之定議

擇本縣官民之廉幹者令各認丈尺編字號酌難易爲哀益剋

期興作懸賞格以課督之三月而役竣

浙江通志

遜可化穎上人以選貢知封邱縣裁强藩侵地消左道戎心卻

民餽遺絲毫不染

潁州府志

李國士字汝志亳州人萬歷丁丑進士知豐城縣擢給事中故

事省中有疏先白政府國士曰儻關白而有所撓將遂止耶因

是與政府左出爲浙東僉事台州大旱禱於關壯繆祠雨隨澍

大學士潘晟子復泰幼悍僕與外戚構擯於外國士置構禍者

於理而潘得有後升陝西右布政思明之役調兩省兵七萬討

之國士監軍冒暑雨瘴癘兼程抵太平賊聞之氣奪乃諭脅從

罔治降者三萬四千人進山西左布政乞休歸

浙江通志
江南通志

王道增字益甫潁州人萬厯庚辰進士擢御史視鹺兩浙以劾

債帥不法忤當道轉湖廣僉事閩人李贄以儒起家二千石創

髮留鬚肆爲隱怪縉紳惑之道增獨逐之出境贄後以左道被

逮眾始服其持正仕至四川右布政

江南通志

王維垣字伯師潁州歲貢授合州同知知州劉冠南爲推官所

誣被逮士民赴闕訟冤事下撫按推官擒爲首者將以激變論

如律維垣詣兩臺力辨冠南事無實百姓爲賢守訟冤不當坐

事得解推官銜之遂拂衣歸

江南通志

胡應聘字任宇潁州舉人知海豐縣歲大饑賑米不足請於上

官出庫銀俾民易粟又貸民牛種有輕罪者令搜草根自贖由

是荒蕪盡闢收穫數倍遷灤州知州未幾謫東藩理問監太山

香稅一無染指後以德府審理致仕環堵蕭然人稱廉吏

江南通志

張名立字德饒太和舉人知秦州廉謹愛民行刑輒哀矜不自

已致仕歸值乙亥寇變誓死防禦城賴以存

潁州府志

徐治民字元禮潁州歲貢知棠陽縣戴星出入百廢具舉尙書

張鶴鳴餉雲中夜過縣聞鈴柝聲達旦問役者曰使君防盜不

敢懈也歷遷刑部郎治獄屢折權貴出爲平越知府輦下泣送

者數萬人

江南通志

劉九光字文孚潁州人萬歷乙未進士知清豐縣歷兵部郎中

條上方略十事悉允行轉山東參政督理糧儲國用充而民不

擾兼設法救荒多所全活擢廣西右布政分守蒼梧徭人窟於

箐峒時出剽掠將吏請剿以邀爵賞九光不可論以德威無不

翰服升雲南左布政乞休歸

江南通志

戴曰强蒙城舉人知餘杭縣南湖自嘉靖後塘堰漸圯奸民盜決漲塞爲平陸種植其中天目諸山水發湖不能受南鄉十八里之民漂溺幾半而錢塘亦被其害曰强清釐舊疆盡闢湖址縱橫十字培原隄各五里互湖中既令土之出有所容而亦藉隄之力以暫緩洪波衝激之勢於是斗門函堰之制畢周各設壩夫守之而湖復故

浙江通志

田旣霑霍邱人萬厯中知藍山縣建東橋築江隄懲豪右之害民者在任五年多惠政

湖南通志

鹿獻陽字宁光潁州人天啟乙丑進士授大同府推官方奉檄赴新平至聚落城時大同猝被圍屯堡防禦久疎獻陽與吏民分地堅守閱數日援至圍解論功以邊才薦奉敕嘉獎

江南通志

湯勛穎上人以貢授桃源簿時邊餉督促勛調劑有方不加賦

而餉足

穎州府志

劉士名字姓允穎州人崇禎戊辰進士知黃巖縣爲政嚴肅大庭之上儼若神明歷任山西少參備兵懷隆備築亭障秣馬訓

兵壁壘旌旗爲之一變以艱歸

浙江通志
穎州府志

田用坤字同乾穎州人崇禎戊辰進士授行人歷官江西右參議分守湖西有邊灘地數千頃上官欲派糧起科用坤恐水漲後復爲民累堅不肯報引疾歸

穎州府志

甯子慶字大履穎州人崇禎甲戌進士知掖縣縣新羅兵悉心撫字民獲生全更值軍興旁午郡縣難支子慶辦理裕如大吏交章薦之擢戶部主事轉員外郎專督新餉委曲應辦從容中款改吏部忌者擠之卽移疾歸

江南通志

元豫字建侯潁州舉人授嚴州府推官郡苦皇絹運船之累力請疏奏分派積害得除所屬遂安等邑賊黨嘯聚豫兼布恩威諭以禍福遂解散

潁州府志

林冲霄字斗客霍邱人崇禎甲戌進士知崇德縣又補鄞縣歷著善政晉禮科給事中調吏科多所建白著述亦富

潁州府志

高天佑字味元潁上人以選貢知觀城縣除暴安良升左州知州致仕歸時邑屢被寇凡築城濬河備火器理糧餉靡不竭力從事更建敵臺於城東北隅以備要害親冒矢石者一月寇甫退忽暈仆城上昇歸而卒

江南通志

張大章字含甫潁州人以蔭官戶部主事遷員外郎權稅蕪湖時商船苦盜大章廉知督木關蠹役所爲擒置於法穴役胥裁

商人立碑頌焉

潁州府志

國朝李文煌字包閣潁州人順治丁亥進士選庶吉士改吏科給事中條陳利病皆中機宜出爲廣東參議時版宇初定有負固未服者或剿或撫悉歸誠焉遷鄖陽副使民貧驛衝積寇盤踞戶口流亡文煌招撫勸墾闢境晏然轉蕩甯參政

江南通志

黃陞字子納亳州人順治初以拔貢知項城縣廉幹有聲升茂州知州建學宮清糧餉減稅課在任七年有麥秀七歧之異以老歸

江南通志

吳孔達字子先蒙城人順治初舉賢良授睢州訓導軍興河決學宮傾圯遷建於縣東南與諸生講習經史士風聿振

蒙城縣志新

王獻明字素功潁州人順治中以貢知道昌縣縣僻處萬山土瘠民貧獻明勞心撫字勸募墾荒招集流亡邑有里夫之累爲

減其差修學禮士清飛詭雪株累邑人頌焉致仕歸

府志

劉象震霍邱人順治七年知新會縣時盜陳德貫作亂象震請兵擒滅之歲饑煮粥食民其婦孺不能來者計口給米多所全活擢西安同知已辦裝值西逆犯城遂協力守禦八月圍解乃

去

一統志廣
東名宦

王輝字衷樸霍邱人以貢知元城縣地衝民貧疲於迎送輝薄

斂輕刑有神君慈母之頌卒於官祀名宦

府志

劉佐臨字與襄潁州人順治己亥進士授兗州府推官有巨盜於七張四兩案株連甚眾力爲平反誅首惡釋無辜未幾裁推官補武城知縣縣經李化鯨亂後民散土荒招徠勸墾一二年閒人盡復業庚戌夏令民修築城隍民以農時求緩不聽且嚴督之隄成二日河決不沒隄者尺許眾驚爲神立碑頌焉遷汾

州府同知告歸

江南通志

劉壯國字幼功佐臨弟也與兄同登進士知夏縣革里長陋規設義學延師教士鹽池水決壞姚遷渠隄三十里例與安邑解州合築皆請期一月壯國遂專任之三日告成聞喜縣有孝子郭景汾報父仇殺人引復讐議得不抵後以勘臨晉荒語觸巡撫罷職歸里

江南通志
潁州府志

劉濟寬字公定亦佐臨弟以舉人知宣平縣當耿逆亂定城市邱墟請給牛種招徠墾闢歲疫廣施醫藥全活甚眾

江南通志
潁州府志

郝翼字先五潁州人康熙初以舉人授漢陽府推官廉平不擾

兼有吏才

大軍南征委催九江軍需星夜經理比軍至而楚北糧芻早積城下戎事初罷案牘山積按律原情務從輕比以勞卒官

江南通志

劉摺字子方潁州人順治己亥進士知淇洞縣縣有龍社里山洞深險頑民逃入不奉租調且時剽掠摺率精騎直抵洞中擒其魁餘黨悉散汾河水溢沒田萬餘畝勘山中棄地勸民開墾得熟田如沒數焉在任六年境內大治會與上官齟齬遂歸

通志

王公楷字木重潁州人順治辛丑進士知成安縣鄰邑有告夫被殺者株連數十人公楷奉檄理之訪得里中自某死後有屠沽兒往外未歸卽命蹤跡捕之果得因奸殺死狀獄遂決縣苦漳水請豁潁河地租晝夜行泥淖中率民修築隄防疏通畝漕未幾水竟西徙出境士民德之以艱歸

江南通志

李甲聲字公振潁州拔貢知廣西天河縣叛民殺官吏會兵進剿奉檄監軍甲聲以叛民因憤怨相誘惑頓兵緩其誅逆黨相

繼解去乃乘閒搗賊巢殲其魁亂遂定遷漳州同知隨征臺灣
卒敢死士冒險先登敘功升廣州知府調慶陽所至勸耕平訟

甚有聲一統志

甯誥字龍錫潁州人順治己亥進士授常德府推官後以裁缺
補上海知縣建書院躬考課致仕歸有友年老無子為置妾得

子其好義類如此潁州府志

黃家鼎字升耳潁上拔貢知咸甯縣平獄慎刑築隄勸農嚴保
甲修學宮立社學諸政備舉擢兵部主事士民請畱復任以勞

疾歸一統志陝西名宦

王覺民潁上貢生前明時流寇圍潁募壯士大破之斬賊二百
餘級入

國朝以從南征有功授潮陽知縣又以守城功升太原知府致仕

歸潁州府志

張琦字佩玉潁州人康熙庚戌進士知陵川縣擢戶部主事歷
郎中時巡撫宋犖以旱災入告同官駁之琦不可曰今歲大旱
皇上宵旰憂勤奈何駁之別具允稿題覆得免正供銀一十八萬九千

兩遷建甯府同知多善政移疾歸江南通志

劉凡字元歎潁州人康熙丙辰進士知孟縣地高苦旱訪元郭
守敬引黃河舊蹟督民挑濬溉田數萬畝清理無主荒田建河
陽書院擢禮部郎中督學陝西作讀書譜爲士子模範致仕歸

潁州府志

唐勳字萬有潁州人康熙己未進士知廬陵縣抑豪強清兼并
捐俸修白鹿書院以憂歸起補臨縣歲荒未及申請卽發賑全

活數萬人江南通志

賜祭葬

潁州府志

鹿祐字有上潁州人康熙壬戌進士知西安縣勸農桑興學校修趙清獻祠墓時民多逋賦定三年帶征之法民賴以舒擢主事晉御史遇事敢言不避嫌怨累官兵部侍郎巡撫河南豫省多水患祐請借穀緩征民困盡甦以廉率屬吏治肅然引疾乞休民不忍捨自豫至潁送者不絕卒

任青銓字文澄潁州拔貢授巢縣教諭捐貲修學宮又闢臥牛

山隙地數十畝種蔬植木以爲學官養廉之資至今賴焉

潁州府志

李紳文字陟屺潁州人康熙戊辰進士知蒲江縣立市廛通鹽

鐵建學宮置學田擢御史巡視東城陳奏悉中機宜督學山西

後以累去官尋起保定府平反疑獄疏通夾河以勞卒

江南通志

連璧字符蒼潁州人以貢官內閣中書補台州郡丞海防鹽課

諸務繁劇處之裕如攝烏程令苞苴不入罍誤去職後以河工
效力署理聊城清理刑獄省釋株連甚眾

潁川府志

石顯字孔彰潁上歲貢任南陽通判改大名升夔州府同知贊

政有聲享年百歲有奇

潁川通志
新增

張扶翼霍邱人康熙初由選貢知黔陽縣邑境羅公山峒獠與
武岡諸砦鬪兵不解扶翼請發鎮兵壓其巢遣諭以利害單騎
深入獠感泣給以荒田令佃作免其役官兵至滇凱旋派黔邑
穀八千石草二十八萬斤扶翼以其狀陳於上官皆得請又爲
本道陳招徠之義一去寄莊之害一寬五年盡墾之限又條議
清丈之法凡城垣學校官廨多所完葺手纂縣志以備掌故

統一

名宦

連際穎字碩菴璧之子以貢知南漳縣調桑植創建石城升永

州府知府修學宮建濂溪書院士民德之孫恆山以貢知秀山縣時縣民與松桃民爭地相讐殺往諭以義人皆悅服於所宿處立碑曰連公信宿處調銅梁士民追送於湖口餽以金卻之

因以其資立橋名曰連公通濟橋

潁州府志

劉應襄字慕哲潁州舉人授湖北水利官監修江陵公安石首監利松滋等處江隄乘小舟往來波濤中者四年漸次完固時屢經水溢發倉賑卹又發帑銀六萬以爲急公者勸而應襄止有督率之責無給散之權覩赴工者日哀號請命應之不能卻之不忍慨然捐軀以謝百姓赴水而死楚民立廟江邊祀之

潁州府志

顏光祿亳州人康熙庚辰武進士由侍衛任龍江關游擊捐貲設立里仁會以助兵民婚喪之無力者又建書院課兵民子弟

升廣東春江副將值歲饑有司未奉檄不肯開倉光昨力擔平
糶升福甯鎮總兵陳奏保甲指掌冊設立倉儲二事下督撫行
之卒於官

江南通志

吳茂林字松如潁州人康熙丙戌進士知井陘縣地舊不知種
植教以築隄引水蒔苗收穫民始知有水田之利署獲鹿代前
令償虧空之累置妾李氏訪知其伯係原任通州牧卽送還不
取其值

潁州府志

李榮白字樂翁潁州人知臨城縣建石隄以捍城歲歉借種不
能償者代償五百餘石乞休歸

潁州府志

方伯字英南潁州人康熙己丑進士知湘潭縣除邑中宿弊民
商稱便巴陵民變伯諭定之

潁州府志

喻觀采字形輝潁州人康熙己丑進士知都昌縣歲歉請賑未

及報聞遽開倉賑濟士民德之卒於官

潁州府志

李竹字湘州潁州人知平山縣盜息民安升順甯知府民苗襍

處德威兼施卒於官

潁州府志

孫士賢字軼凡亳州人康熙中以諸生知撫甯縣建義學興利除弊縣當衝要驛馬不敷民苦派應士賢力請增馬民派永除

其累乞休歸士民泣送

潁州府志

孫國柱字典樞亳州貢生雍正初以薦發往福建署甌甯知縣調閩清所至蠲苛派墾荒蕪備儲積巨猾積盜弭耳伏法時大吏檄飭各屬捐備社穀承風旨者刻期報盈國柱獨以地瘠民貧面請弛期大吏怒將以沮撓劾之閩清去省近百姓聞之相率報捐赴省投冊數爲諸邑冠乃得免升懷慶通判擢馬龍州知州革陋規興義學廉靜勤慎老而益厲以疾告歸

亳州志

鹿驄豫字介石阜陽優貢雍正初薦舉人才官湖北沔陽州判

捐修江隄時稱鹿公隄

阜陽呈冊
新刊

仕至貴州鎮遠知府

舊志
選舉

周天福亳州人乾隆九年知甯德縣戡暴除奸重儒興學士民

祀之遺愛祠

一統志編
建名宦

孫元炘字庶虞亳州拔貢國柱次子也曾以州判職分發四川

改發河南委署永城縣丞值河決調辦南岸新河功將告成忽

有異魚數百羣聚河口水大涌元炘乃作文祭之魚遂去而流

始暢以功題袖陝州判盧邑令以派辦河料嚴急爲民所毆辱

幾釀變元炘馳往諭以利害民遂解散安南來朝委辦迎澤渡

撰有伺渡紀略以艱歸

亳州志

臺仕佳霍邱人官嘉祥知縣會修南旺湖椿木派民爲害革而

禁之調陽穀邑有鵝鴨坡荒地千餘頃糧多逋欠勘明詳請咨

部豁免永除民累擢東平知州

霍邱縣志

朱際盛亳州歲貢官績溪訓導初到任即查前案被詳斥者二十餘人訪之輿論稍其案情力請督學矜全得復衿冠者四十多士感激又捐俸修學宮樂器課士有方告歸卒年七十九

志

亳州

賈國華霍邱人乾隆庚子舉人以大挑官四川知縣擢江西南康府知府多善政後升廣東肇羅道所轄十六屬皆近海洋匪出入為民害國華警備嚴整無敢犯境或指東安民某為盜株連數十人察其冤立釋之東安為立生祠

霍邱縣志

何賜年霍邱人官四川知縣嘗署樂山輯獲巨盜又署西充歲饑傾囊倡捐賑稱最善邑豪為民害者立置之法解任之日士民遮道乞留

霍邱縣志

劉毓琇亳州諸生初補廣東湛川司巡檢署化州增城縣事值山水暴漲親駕小舟拯救兼辦賑卹貧民皆得實惠活人數萬後以獲盜功歷升至山東兗州府通判

亳州志

張鼎霍邱人乾隆己酉舉人官寶應訓導捐俸倡修學宮邑有漢臧洪陳容祠又明知縣李涑祠皆湮廢鼎爲訪其遺趾復建之諸生有以訟被誣將羅重辟者爲之白其冤得釋庚午寶應河決總督松筠捐廉賑濟檄鼎及丞倅等官督散同列皆畏憚之無敢侵漁去官日諸生餞送皆至百里外

霍邱縣志以上舊志

何天衢亳州廩生

賜舉人官廣東廉州知府清積案勸農桑葺學宮立社學置學田修養

濟院建城西二橋搜緝奸宄終山東濟東道

亳州志以下新修

徐錫智太和人河南鹿邑籍由舉人任陳畱教諭查勘黃水沙

壓地畝升廣東海康知縣設船烏石港練勇巡防擒匪多起洋

面肅清嘉慶初病故

太和縣志

王統字會一阜陽拔貢由教習分發四川知縣嘉慶十五年署江油縣事性耿介操履刻苦減徭役重學校設立義學瓜代曰士民爲具資斧泣送者數千人後卒於成都寓所貧無以斂江油士民請留其櫬而贍其孥其子不可負櫬以歸

四川通志

汪振基字艮山潁上進士授編修道光乙未督學山西崇正學釐祀典請毀三教廟奉

旨允行通諭各省一體嚴禁游轉侍讀終候選道著執硯齋集

潁上縣志

鹿敬列字咸正阜陽舉人湖北知縣道光中署棗陽捕治鹽梟土豪署崇陽時鍾人傑甫平撫循勞來民賴以安卒官民立石

識遺愛

阜陽縣志

李大年字耆英阜陽增貢湖北安陸同知署德安知府積案一空委鞫荆屬爭洲毆官獄一夕定讞署襄樊同知捕教匪擒其渠魁解散餘黨攝荆門州捐修隄工代賑水災有婦殺夫以被人縛溺告大年按驗婦室得斷繩與尸繩截痕宛然詰問驚服時稱神明

阜陽縣志